

თვითმმართველი ქალაქი ფოთის საკრებულოს

დადგენილება №14/18

2014 წლის 7 ივლისი

ქ. ფოთი

ქალაქ ფოთის მუნიციპალიტეტის ტერიტორიაზე ავტოსატრანსპორტო საშუალებების
პარკირების წესის დამტკიცების შესახებ

„ადგილობრივი თვითმმართველობის კოდექსის“ საქართველოს ორგანული კანონის მე-16 მუხლის მე-2 პუნქტის „კ“ ქვეპუნქტისა და ამავე კოდექსის 24-ე მუხლის მე-2 პუნქტის შესაბამისად, ქალაქ ფოთის მუნიციპალიტეტის საკრებულომ დაადგინა:

მუხლი 1

დამტკიცდეს ქალაქ ფოთის მუნიციპალიტეტის ტერიტორიაზე ავტოსატრანსპორტო საშუალებების პარკირების წესი თანახმად დანართი №1ისა.

მუხლი 2

ეს დადგენილება ამოქმედდეს გამოქვეყნებისთანავე.

ქალაქ ფოთის საკრებულოს
თავმჯდომარე

დავით ბაბილუა

დანართი №1

ქალაქ ფოთის მუნიციპალიტეტის ტერიტორიაზე ავტოსატრანსპორტო
საშუალებების პარკირების წესი

მუხლი 1. ზოგადი დებულებანი

1. ქალაქ ფოთის მუნიციპალიტეტის ტერიტორიაზე ავტოსატრანსპორტო საშუალებების პარკირების წესი შემუშავებულია „ადგილობრივი თვითმმართველობის კოდექსის“ საქართველოს ორგანული კანონის, „საგზაო მოძრაობის შესახებ“ საქართველოს კანონის, საქართველოს ადმინისტრაციულ სამართალდარღვევათა კოდექსის და სხვა საკანონმდებლო და კანონქვემდებარე ნორმატიული აქტების შესაბამისად და განსაზღვრავს ქალაქ ფოთის მუნიციპალიტეტის კომპეტენციას პარკირების რეგულირებისა და პარკირების სფეროს მართვის საკითხებში, ქალაქ ფოთის მუნიციპალიტეტის ტერიტორიაზე ავტოსატრანსპორტო საშუალებების პარკირების ორგანიზებისა და კონტროლის განხორციელების წესს.

2. პარკირების წესი შემუშავებულია ქალაქ ფოთის მუნიციპალიტეტის ტერიტორიაზე პარკირების ორგანიზებისა და ქალაქის გზების ტრანსპორტისაგან განტვირთვის მიზნით.

მუხლი 2. ტერმინთა განმარტება

პარკირების წესში გამოყენებულ ტერმინებს აქვთ შემდეგი მნიშვნელობა:

1. ავტოსატრანსპორტო საშუალება – ძრავიანი სატრანსპორტო საშუალება ან სატრანსპორტო საშუალებათა შეწყვილებული კომბინაცია, რომელიც გამოიყენება გზაზე ტვირთის გადასაზიდად და მგზავრთა გადასაყვანად;

2. გადახდის დამადასტურებელი საბუთი – ქალაქის ან ნებისმიერი სხვა მასალისაგან დამზადებული ბილეთი, ელექტრო ან სხვა სახის მოწყობილობა, რომელიც ადასტურებს პარკირების საფასურის გადახდის ფაქტს ან საფასურის შემდგომში გადახდის უფლებას;

3. გზა – სატრანსპორტო საშუალების მოძრაობისათვის მოწყობილი მიწის ზოლი ან ხელოვნური ნაგებობის ზედაპირი;



4.პარკირება/დგომა (შემდგომში – პარკირება) – ქალაქ ფოთის მუნიციპალიტეტის ტერიტორიაზე პარკირების ადგილებზე ავტოსატრანსპორტო საშუალების მოძრაობის გამიზნულად შეწყვეტა 5 წუთზე მეტი დროით, თუ ეს არ ეხება მგზავრთა ჩასხდომა-გადმოსხდომას;

5.პარკირების ადგილი – პარკირების მიზნით გამოყოფილი მიწა, შენობა, ნაგებობა ან მათი ნაწილი, სპეციალურად მოწყობილი მოედანი, ავტოსატრანსპორტო საშუალების მოძრაობისათვის განკუთვნილი გზა ან/და ტროტუარი;

6. პარკირების ოპერატორი – მოქმედი კანონმდებლობით განსაზღვრული ქონების განკარგვის ერთ-ერთი ფორმით შერჩეული პირი;

7.პარკირების პირობები – პარკირების დაშვება/შეზღუდვა/აკრძალვა გარკვეული დროით, პარკირების ადგილზე ავტოსატრანსპორტო საშუალების სადგომზე დაყენების ხერხი, პარკირების საფასური და შეღავათები საფასურის გადახდისას, ამ პირობების კომბინაცია ან რაიმე სხვა პირობები;

8.ტროტუარი – გზის ელემენტი, რომელიც მიერთებულია სავალ ნაწილთან ან გამოყოფილია მისგან გაზონით და განკუთვნილია ქვეითის მოძრაობისათვის;

9.ქალაქ ფოთის მუნიციპალიტეტის ტერიტორია – საქართველოს მოქმედი კანონმდებლობით დადგენილი ქალაქ ფოთის მუნიციპალიტეტის ადმინისტრაციულ საზღვრებში მოქცეული ტერიტორია.

მუხლი 3. პარკირება

1. ავტოსატრანსპორტო საშუალების პარკირება დაიშვება მხოლოდ პარკირების ადგილებზე, გარდა კანონმდებლობით გათვალისწინებული შემთხვევებისა.

2. ფასიანი პარკირების ადგილებზე უფასო პარკირება დასაშვებია იმ ავტოსატრანსპორტო საშუალებებისათვის, რომლებიც გამოიყენება:

- ა) საგანგებო სიტუაციების თავიდან აცილების ან ლიკვიდაციისათვის;
- ბ) უფლებამოსილი სტრუქტურების მიერ საზოგადოებრივი წესრიგის დაცვის სამუშაოებისათვის;
- გ) მოსახლეობისათვის სამედიცინო მომსახურების აღმოსაჩენად;
- დ) ნებადართული სარემონტო ან სამშენებლო სამუშაოების წარმოებისათვის;
- ე) ქალაქ ფოთის მუნიციპალიტეტის დაგვა-დასუფთავებისათვის;
- ვ) ინკასაციისათვის.

3. ქალაქ ფოთის მუნიციპალიტეტის საკრებულოს მიერ პარკირების ადგილების განსაზღვრა ხდება შემდგომი პირობების გათვალისწინებით, კერძოდ:

- ა) ქალაქ ფოთის მუნიციპალიტეტის განვითარების ინტერესების;
- ბ) მოსახლეობის სიმჭიდროვის;
- გ) სატრანსპორტო ნაკადის;
- დ) ეკოლოგიური მდგომარეობის;
- ე) გზის გამტარუნარიანობის;
- ვ) საგზაო მოძრაობის უსაფრთხოების;
- ზ) საზოგადოების სხვა ინტერესების.

4. ქალაქ ფოთის მუნიციპალიტეტის საკრებულო კანონმდებლობის შესაბამისად, ქალაქ ფოთის მუნიციპალიტეტის ტერიტორიაზე განსაზღვრავს:

- ა) ადგილებს, სადაც არ შეიძლება ავტოსატრანსპორტო საშუალების პარკირება;
- ბ) პარკირების ადგილებს, მათ შორის, სპეციალური პარკირების ადგილებს;
- გ) პარკირების ადგილებზე ავტოსატრანსპორტო საშუალებების სადგომზე დაყენების ხერხებს.

მუხლი 4. პარკირების სფეროს მართვა

1. ქალაქ ფოთის მუნიციპალიტეტის ტერიტორიაზე ქალაქ ფოთის მუნიციპალიტეტის პარკირების სფეროს მართვას ახორციელებს მოქმედი კანონმდებლობით განსაზღვრული ქონების განკარგვის ერთ-ერთი ფორმით შერჩეული იურიდიული პირის მეშვეობით.

2. პარკირების სფერო სამართავად შეიძლება გადაეცეს ერთ პირს ან განაწილდეს რამდენიმე პირს შორის.

3. პარკირების სფეროს სამართავად გადაცემის პირობებს ადგენს ქალაქ ფოთის მუნიციპალიტეტის წარმომადგენლობითი ორგანო.

მუხლი 5. პარკირების ორგანიზება

1. პარკირების ადგილებზე პარკირება განისაზღვრება მოქმედი კანონმდებლობის, ამ წესის შესაბამისად.

2. ფიზიკურ ან/და იურიდიულ პირთა სარგებლობაში არსებულ სახელმწიფო ან თვითმმართველი ერთეულის



უძრავ ქონებაზე პარკირების პირობები დგინდება შესაბამისი ხელშეკრულების, მოქმედი კანონმდებლობისა და ამ წესის შესაბამისად.

3. კერძო საკუთრებაში არსებულ უძრავ ქონებაზე პარკირების პირობები დგინდება მესაკუთრის მიერ მოქმედი კანონმდებლობის შესაბამისად.

4. პარკირება დაიშვება, თუ არ არის გაჩერების და დგომის აკრძალვის საგზაო ნიშანი, აგრეთვე საგზაო მონიშვნა, ან წინამდებარე წესითა და მოქმედი კანონმდებლობით დადგენილი სხვა აკრძალვა.

5. სახანძრო ჰიდრანტის, საკანალიზაციო და სანიაღვრე ჭების, ნაგავშემკრები კონტეინერების განთავსების ადგილის მიმდებარედ პარკირება დაიშვება უსაფრთხოების წესების დაცვით.

6. პარკირების მიზნებისათვის საგზაო ნიშნები „დგომა აკრძალულია“, „გაჩერება აკრძალულია“ და შესაბამისი საგზაო მონიშვნა მოიცავს ტროტუარზე პარკირების აკრძალვასაც.

7. პარკირების ადგილის მომიჯნავე, მოსაზღვრე ტროტუარზე პარკირება აკრძალულია. აღნიშნული აკრძალვა მოიცავს, როგორც პარკირების ადგილის მომიჯნავე, მოსაზღვრე ტროტუარის მონაკვეთს, ისე მთლიან ტროტუარს, თუ საგზაო ნიშნით, აგრეთვე შესაბამისი საგზაო მონიშვნით სხვა რამ არ არის დადგენილი.

8. პარკირების ადგილებზე ავტოსატრანსპორტო საშუალებების პარკირება შეიძლება საფასურის გადახდით ან მის გარეშე.

9. ადგილები, სადაც პარკირება აკრძალულია ან ფასიანია, აღჭურვილ უნდა იქნას შესაბამისი საგზაო ნიშნებით, აგრეთვე საგზაო მონიშვნებით.

10. სპეციალურ პარკირების ადგილებზე, შესაძლებელია მხოლოდ იმ ავტოსატრანსპორტო საშუალებების პარკირება, ვისთვისაც განკუთვნილია ეს პარკირების ადგილი.

11. ტროტუარებზე პარკირების ადგილების განსაზღვრისას გათვალისწინებულ უნდა იქნეს ის გარემოება, რომ გაჩერებულმა ავტოსატრანსპორტო საშუალებებმა დაბრკოლება არ შეუქმნან სხვა სატრანსპორტო საშუალებების ან ქვეითის, მათ შორის, შეზღუდული შესაძლებლობის მქონე პირის მოძრაობას.

12. ტროტუარები, სადაც პარკირება ნებადართულია, შესაძლებელია აღიჭურვოს შესაბამისი საგზაო ნიშნებით, აგრეთვე საგზაო მონიშვნებით.

13. სადღესასწაულო და მასობრივი ღონისძიებების გამართვის დროს, საზოგადოების უსაფრთხოების უზრუნველსაყოფად ან რაიმე სხვა მიზნით ავტოსატრანსპორტო საშუალებების მოძრაობის რეგულირებისთვის ქალაქ ფოთის მუნიციპალიტეტის საკრებულო უფლებამოსილია დროის გარკვეული პერიოდის განმავლობაში ქალაქ ფოთის მუნიციპალიტეტის ტერიტორიის ცალკეულ ადგილებში, გარკვეული დღეების, დღე-ღამის გარკვეული მონაკვეთების განმავლობაში ცალკეული სახეობის ავტოსატრანსპორტო საშუალებისათვის აკრძალოს/დააშუშვას პარკირება ან/და დააწესოს პარკირების სპეციალური პირობები.
ქალაქ ფოთის მუნიციპალიტეტის საკრებულოს 2016 წლის 28 იანვრის დადგენილება №2/2 - ვებგვერდი, 04.02.2016წ.

მუხლი 6. სპეციალური პარკირების ადგილების და პირობების განსაზღვრა

1. ქალაქ ფოთის მუნიციპალიტეტის საკრებულო უფლებამოსილია განსაზღვროს სპეციალური პარკირების ადგილები და პირობები:

- ა) ტაქსების, ქალაქ ფოთის მუნიციპალიტეტის ტერიტორიაზე ტრანზიტით შემომავალი ავტოსატრანსპორტო საშუალებების პარკირებისათვის;
- ბ) ტვირთის ჩატვირთვა-გადმოტვირთვისათვის ავტოსატრანსპორტო საშუალებების პარკირებისათვის;
- გ) საწვავის, რადიაქტიური და ტოქსიკური ნივთიერებების, გაზისა და სხვა აალებადი ნივთიერებების, ან აღნიშნული ნივთიერებებისათვის განკუთვნილი კონტეინერების ტრანსპორტირებისათვის განკუთვნილი ავტოსატრანსპორტო საშუალებების პარკირებისათვის.

2. ავტოსატრანსპორტო საშუალების, რომლის სიგანეც აღემატება 2.5 მეტრს, ამ წესის მე-3 მუხლის მე-2 პუნქტში ჩამოთვლილი ავტოსატრანსპორტო საშუალებების გარდა, პარკირება შესაძლებელია ამ სახის ავტოსატრანსპორტო საშუალებების პარკირებისათვის განსაზღვრულ ადგილებზე.

3. შეზღუდული შესაძლებლობის მქონე პირთა გადაადგილების უზრუნველსაყოფად, შესაბამისი საცნობი ნიშნის მქონე ავტოსატრანსპორტო საშუალებათა პარკირების ადგილებს განსაზღვრავს ქალაქ ფოთის მუნიციპალიტეტის მერი ან მერის მიერ უფლებამოსილი პირი.

4. შეზღუდული შესაძლებლობის მქონე პირთა გადაადგილების უზრუნველსაყოფად, საცნობი ნიშნის გაცემაზე პასუხისმგებელია ქალაქ ფოთის მუნიციპალიტეტის მერი ან მერის მიერ უფლებამოსილი პირი. საცნობი ნიშანი გაიცემა როგორც მკვეთრად გამოხატული შეზღუდული შესაძლებლობის, ისე მნიშვნელოვნად გამოხატული შეზღუდული შესაძლებლობის სტატუსის მქონე პირებზე. საცნობი ნიშნის განთავსება შესაძლებელია ნებისმიერ ავტოსატრანსპორტო საშუალებაზე, მიუხედავად შეზღუდული შესაძლებლობის მქონე პირის სარგებლობაში არსებული ავტოსატრანსპორტო საშუალების კუთვნილებისა. სხვა მუნიციპალიტეტის ტერიტორიაზე გაცემულ საცნობ ნიშანს იგივე იურიდიული ძალა აქვს როგორც ქალაქ ფოთის მუნიციპალიტეტის მერის ან მერის მიერ უფლებამოსილი პირის მიერ გაცემულ საცნობ ნიშანს.

5. შეზღუდული შესაძლებლობის მქონე პირის საცნობი ნიშნის მატარებელი ავტოსატრანსპორტო საშუალებებისათვის განსაზღვრული პარკირების ადგილები უნდა იყოს შესაბამისად გამოყოფილი და



აღნიშნული. ასეთ პარკირების ადგილზე შეიძლება მხოლოდ შეზღუდული შესაძლებლობის მქონე პირის საცნობი ნიშნის მატარებელი ავტოსატრანსპორტო საშუალებების პარკირება.

ქალაქ ფოთის მუნიციპალიტეტის საკრებულოს 2017 წლის 13 დეკემბრის დადგენილება №5/34 - ვებგვერდი, 18.12.2017წ.

მუხლი 7. ავტოსატრანსპორტო საშუალების მძღოლის და მესაკუთრის უფლებები და მოვალეობები პარკირებისას

1. ავტოსატრანსპორტო საშუალების მძღოლმა ან მესაკუთრემ, ავტოსატრანსპორტო საშუალების პარკირება უნდა მოახდინოს მისთვის ნებადართულ ერთ პარკირების ადგილზე და ისე რომ:

ა) დაბრკოლება არ შეუქმნას სხვა ავტოსატრანსპორტო საშუალების პარკირებას ან/და მოძრაობას;

ბ) ხელი არ შეუშალოს საგზაო ნიშნის ან მისი ნაწილის იდენტიფიცირებას;

გ) ადგილი არ ჰქონდეს ორმაგ პარკირებას – პარკირებისათვის განკუთვნილ ადგილზე განთავსებული ავტოსატრანსპორტო საშუალების მომიჯნავედ ან/და სხვა ავტოსატრანსპორტო საშუალების ისეთი დგომა, რომელიც სცდება საღებავით მონიშნული პარკირების ადგილის საზღვრებს;

დ) არ დაარღვიოს პარკირებისათვის განკუთვნილ ადგილზე ავტოსატრანსპორტო საშუალების სადგომზე დაყენების ხერხი.

2. ავტოსატრანსპორტო საშუალების მძღოლი ან მესაკუთრე ვალდებულია არ მოახდინოს პარკირება:

ა) სპეციალურ, მათ შორის, შეზღუდული შესაძლებლობის მქონე პირთა პარკირების ადგილას შესაბამისი საცნობი ნიშნის ან სტატუსის მქონე ავტოსატრანსპორტო საშუალების გარეშე;

ბ) შესაბამისად მონიშნულ ავტობუსის ან/და მიკროავტობუსის გაჩერების ადგილზე;

გ) ამ მუხლის პირველი პუნქტით განსაზღვრულ შემთხვევებში.

3. ფასიან პარკირების ადგილზე დაყენებული ავტოსატრანსპორტო საშუალების მძღოლმა ან მესაკუთრემ პარკირების საფასური უნდა გადაიხადოს ერთ-ერთი იმ საშუალებითა და ფორმით, რომელიც პარკირების ამ ადგილისათვის არის დადგენილი და საჭიროების შემთხვევაში უნდა დაასაბუთოს მის მიერ საფასურის გადახდა.

მუხლი 8. პარკირების საფასური

1. დადგინდეს ქალაქ ფოთის მუნიციპალიტეტის ტერიტორიაზე პარკირების ადგილებით სარგებლობისათვის საფასური დროის შემდეგი მონაკვეთების მიხედვით:

ა) 1 დღე – 1 (ერთი) ლარი;

ბ) 7 დღე – 5 (ხუთი) ლარი;

გ) 30 დღე – 10 (ათი) ლარი;

დ) 180 დღე – 25 (ოცდახუთი) ლარი;

ე) 365 დღე – 40 (ორმოცი) ლარი.

სპეციალურ და სატვირთო ავტომობილებზე:

ა) 1 დღე – 2 (ორი) ლარი;

ბ) 10 დღე – 10 (ათი) ლარი;

გ) 30 დღე – 30 (ოცდაათი) ლარი;

დ) 180 დღე – 150 (ასორმოცდაათი) ლარი;

ე) 365 დღე – 250 (ორასორმოცდაათი) ლარი.

2. პარკირების საფასურის გადახდის პასუხისმგებლობა ეკისრება ფასიანი პარკირების ადგილზე პარკირებული ავტოსატრანსპორტო საშუალების მესაკუთრეს.

ქალაქ ფოთის მუნიციპალიტეტის საკრებულოს 2016 წლის 28 იანვრის დადგენილება №2/2 - ვებგვერდი, 04.02.2016წ.

ქალაქ ფოთის მუნიციპალიტეტის საკრებულოს 2019 წლის 26 ივნისის დადგენილება №13/16 - ვებგვერდი, 01.07.2019წ.

მუხლი 9. კონტროლი და პასუხისმგებლობა



1. ქალაქ ფოთის მუნიციპალიტეტის ადმინისტრაციულ საზღვრებში ავტოსატრანსპორტო საშუალებების პარკირების წესების დარღვევა გამოიწვევს საქართველოს ადმინისტრაციულ სამართალდარღვევათა კოდექსის 125⁴ მუხლით გათვალისწინებულ პასუხისმგებლობას.

2. საქართველოს ადმინისტრაციულ სამართალდარღვევათა კოდექსის 239-ე მუხლის 27-ე ნაწილის, 209³ მუხლის პირველი ნაწილის შესაბამისად, ამავე კოდექსის 125⁴ მუხლით გათვალისწინებულ ადმინისტრაციული სამართალდარღვევაზე, ადმინისტრაციულ სამართალდარღვევის ოქმებს ადგენს, საქმეებს განიხილავს და შესაბამის ღონისძიებებს ატარებს ქალაქ ფოთის მუნიციპალიტეტის მერიის არქიტექტურის, სივრცითი მოწყობის და ადმინისტრაციული ზედამხედველობის სამსახური ან მის მიერ უფლებამოსილი პირი.

ქალაქ ფოთის მუნიციპალიტეტის საკრებულოს 2016 წლის 28 იანვრის დადგენილება №2/2 - ვებგვერდი, 04.02.2016წ.

ქალაქ ფოთის მუნიციპალიტეტის საკრებულოს 2019 წლის 26 ივნისის დადგენილება №13/16 - ვებგვერდი, 01.07.2019წ.

ქალაქ ფოთის მუნიციპალიტეტის საკრებულოს 2019 წლის 30 ივლისის დადგენილება №15/18 - ვებგვერდი, 02.08.2019წ.

მუხლი 10. დასკვნითი დებულება

ამ წესში ცვლილებისა და დამატების შეტანა ხდება მოქმედი კანონმდებლობით დადგენილი წესით.

